

13/03/2002

PM tegur guru lupa jasa kerajaan

Kadir Dikoh

SHAH ALAM, Selasa - Datuk Seri Dr Mahathir Mohamad hari ini menegur sikap sesetengah guru yang lupa kepada jasa baik kerajaan semata-mata kerana pengaruh politik kepartian.

Perdana Menteri juga bimbang dengan sikap segelintir masyarakat yang hanya suka mencari kesalahan orang lain, seolah-olah orang itu saja yang betul, sedangkan mereka tidak berusaha memajukan diri, masyarakat dan negara.

Kebimbangan ini dinyatakan oleh Dr Mahathir dalam ucap utama di Konvensyen Perdana Pendidikan Kebangsaan 2002 siri ke-3 di Hotel Grand Bluewave di sini, hari ini.

Majlis tertutup itu dihadiri kira-kira 500 pendidik dari seluruh negara. Konvensyen empat hari itu antara lain bertujuan melihat dan menilai hala tuju kepemimpinan pendidikan semasa dalam konteks pemimpin sebagai penggerak wawasan.

Konvensyen tahunan itu bertemakan 'Kecemerlangan Kepemimpinan Pendidikan Asas Kejayaan Wawasan' yang antara lain akan merangka strategi memartabatkan profesion perguruan selain menyesuaikan pendidikan dalam pembinaan serta pembentukan bangsa dan negara.

Hadir sama ialah Menteri Besar Selangor, Datuk Seri Dr Mohamad Khir Toyo; Timbalan Menteri Pendidikan, Datuk Abdul Aziz Shamsuddin dan Ketua Pengarah Pendidikan, Datuk Abdul Rafie Mahat.

Bercakap kepada pemberita kemudian, Abdul Aziz berkata Dr Mahathir ketika menyentuh isu pembabitan guru dalam politik, menasihatkan mereka tidak mudah terpengaruh dengan unsur negatif.

"Guru mengajar orang menjadi baik dan disediakan dengan segala kemudahan tetapi ada yang berasakan itu semua sudah cukup baik. Kadangkala apabila kita (pemimpin kerajaan) tidak berjumpa mereka tetapi orang lain yang menemui mereka, maka dia tukar haluan (politik).

"Dia (guru) lupa kepada kebaikan dan hanya mendengar serta mengikut orang yang mempengaruhi fikiran dia. Inilah yang ditekankan Perdana Menteri apabila menasihatkan guru jangan lupa jasa baik kerajaan," katanya.

Beliau berkata, Dr Mahathir juga berpendapat sikap kurang berusaha dan malas menjadi antara sebab kelemahan bangsa. Perdana Menteri turut melahirkan keyakinan orang Melayu boleh maju seperti orang lain jika mereka rajin berusaha.

"Dr Mahathir memberi penekanan mengenai perlunya seseorang memberikan fokus dan mempunyai sikap bersungguh-sungguh dalam melakukan apa juga perkara. Beliau merasakan kita tidak jauh ketinggalan daripada orang lain.

"Cuma kita tidak memberi masa untuk bersungguh-sungguh dalam satu-satu hal. Kalau kita bersungguh-sungguh dan dengan ada kemudahan terutama yang disediakan kerajaan sekarang ini, sudah tentu bangsa kita akan menjadi bangsa yang maju di dunia," katanya.

Dr Mahathir turut menyentuh persoalan melahirkan warga negara yang baik serta menasihatkan guru supaya mempunyai matlamat dalam hidup, memahaminya dan membentuk keperibadian.

Dr Mahathir turut menekankan mengenai pentingnya penguasaan sains dan bahasa Inggeris sebagai bahasa perantara antarabangsa dengan tidak menolak kepentingan bahasa Melayu.

Perdana Menteri mengetepikan kepentingan politik dan menumpukan usaha memajukan bangsa melalui pendidikan.

Ini termasuk mengubah minda orang Melayu sejak di sekolah lagi ke arah matlamat memajukan bangsa dan negara dan mengelak diri mereka daripada dipengaruhi oleh unsur negatif dalam masyarakat.

(END)